

PENCEGAHAN DAN HUKUMAN PERBUATAN BUANG BAYI MENURUT PERUNDANGAN SYARIAH DAN SIVIL DI MALAYSIA: CUKUPKAH UNDANG-UNDANG YANG ADA?¹

*(Prevention and Punishment for Baby-Dumping according to
Syariah and Civil Law in Malaysia: Is the Law Adequate?)*

Adibah Bahori
putriaufa@yahoo.com

Siti Zubaidah Ismail
szubaida@um.edu.my

Jabatan Syariah dan Undang-undang,
Akademi Pengajian Islam, Universiti Malaya.

Abstrak

Kes pembuangan bayi adalah antara perbuatan tidak berperikemanusiaan yang semakin membimbangkan dan mendapat liputan meluas di Malaysia. Ekoran itu, Kabinet Malaysia memutuskan bahawa kes pembuangan bayi hendaklah disiasat sebagai kes bunuh atau percubaan membunuh bagi mencegah masyarakat melakukan kesalahan tersebut. Artikel ini mengkaji sama ada kerangka perundangan yang berkaitan dengan hukuman dan pencegahan terhadap kesalahan tersebut mencukupi atau tidak bagi membendung perbuatan tersebut daripada berlaku. Didapati bahawa peruntukan kesalahan yang berkaitan dengan nyawa dan tubuh badan seperti membunuh, percubaan membunuh, serta perbuatan yang

1 Artikel ini merupakan versi baharu kertas kerja asal yang dibentangkan oleh penulis di International Conference on Islamic Jurisprudence 2016 anjuran Jabatan Syariah Fakulti Pengajian Islam, Universiti Kebangsaan Malaysia dengan kerjasama College of Islamic Studies Prince of Songkhla University Thailand Pattani Campus, di Krabi Front Bay Resort, Krabi, Thailand pada 29 Oktober 2016.

menyebabkan kematian dan kecederaan boleh didakwa di bawah Kanun Keseksaan dan Akta Kanak-kanak 2001. Peruntukan kesalahan di bawah Akta Kesalahan Jenayah Syariah juga didapati mencukupi bagi mencegah kesalahan khalwat, percubaan persetubuhan haram, dan sebagainya. Walau bagaimanapun, pelbagai usaha perlu ditingkatkan bagi menguar-uarkannya kepada masyarakat.

Kata kunci: pembuangan bayi, kesalahan membunuh, hukuman, pencegahan, undang-undang syariah, undang-undang sivil

Abstract

Baby-dumping is one of the most inhumane acts that is on the rise in Malaysia. News about such incidents is prevalent in the mass media, resulting in a cabinet decision being made that baby-dumping cases should be investigated as homicide and attempted murder in order to curb the number of incidents. This article aims at examining whether the legal framework concerning punishment and prevention are adequate to address this matter. It is found that offenders can be charged under the Penal Code and Child Act of 2001 for any offences regarding the life of a person such as murder, attempted murder, or any act causing death and injury. The Shariah Criminal Offences Act, which is applicable for such offences as close proximity, illegitimate sexual intercourse, public indecency and so on, is also adequate to curb the issue of baby-dumping. However, efforts to inform the public of these must be stepped up.

Keywords: abandoned babies, baby-dumping, murder, punishment, prevention, shariah law, civil law

PENDAHULUAN

Pembuangan dan pembunuhan bayi adalah antara jenayah yang paling kejam dan tidak berperikemanusiaan yang berlaku di negara ini (Anita, Adibah, & Nazura, 2012). Bayi yang lahir dan tidak diingini dibuang dan ditemui dalam keadaan tidak bernyawa di tempat kotor seperti di dalam tong sampah (Termizi *et al.*, 2014) dikerumuni semut di atas rumput, hanyut di dalam sungai, digonggong binatang buas, dibuang di dalam tandas, (Adesiyun *et al.*, 2010) ditanam, dan sebagainya.

Keadaan yang tragis ini menunjukkan betapa dahsyatnya perlakuan tersebut. Anak yang tidak dikehendaki ini lahir akibat hubungan luar nikah yang perlu dibuang bagi menyembunyikan bukti persetubuhan haram yang dilakukan (Khadijah *et al.*, 2012). Terdapat juga bayi terbuang yang ditemui dalam keadaan hidup yang ditinggalkan di masjid, di hadapan rumah, dan sebagainya. Lebih menyedihkan lagi, jenayah ini dilakukan oleh orang Islam (Hashim, Khairulhelmi, & Mohd. Fahmi, 2008). Jenayah yang semakin berleluasa ini menggesa kerajaan melakukan pelbagai usaha bagi membendung, mencegah dan mengurangkan perbuatan yang tidak berperikemanusiaan ini. Antara langkah yang dilaksanakan oleh kerajaan termasuklah menerusi intervensi awal selepas kelahiran, iaitu dengan mewujudkan “Baby Hatch” sebagai tempat untuk meninggalkan bayi yang tidak diinginkan. Terdapat juga usaha badan bukan kerajaan (NGO) yang mengadakan kempen “Anda Bijak Jauhi Zina” yang dipelopori oleh pengasas Raudatus Sakinah (Syaidatun Nazirah *et al.*, 2014), kempen kesihatan reproduksi, pendidikan seks (Eva Susanti, 2000) dan pelbagai lagi. Meskipun demikian, intervensi perundangan dilihat masih kurang dilaksanakan, apatah lagi memberikan kesan kepada kumpulan sasaran yang terdedah kepada perbuatan zina yang dikenal pasti sebagai punca utama perbuatan buang bayi. Ekoran berleluasanya jenayah tersebut, Kabinet Malaysia memutuskan bahawa kes buang bayi disiasat sebagai kes bunuh atau percubaan membunuh kerana wujud elemen kematian. Perkara ini diputuskan sejak Ogos 2010 oleh pihak Menteri Pembangunan Wanita, Keluarga dan Masyarakat. Sementara itu, dalam satu kenyataan kementerian berkenaan, kerajaan mengarahkan polis menyiasat kes pembuangan bayi sebagai kes percubaan membunuh atau sekiranya dengan niat sebagai kes bunuh yang boleh dijatuhkan hukuman gantung (*Berita Harian*, 12 Ogos 2010).

Ahli akademik yang menulis tentang isu buang bayi banyak memfokuskan aspek perlindungan, kebajikan dan pencegahan kanak-kanak terbuang (Mustafa Afifi *et al.*, 2013), manakala dari sudut undang-undang hanya memfokuskan kerangka undang-undang sivil (Termizi *et al.*, 2014), tetapi amat kurang melihat dari sudut perundangan secara menyeluruh menurut kerangka syariah dan sivil. Artikel ini mengkaji mekanisme perundangan menurut kerangka

syariah dan sivil yang sedia ada di Malaysia bagi menangani jenayah pembuangan bayi, dan seterusnya menganalisis sama ada undang-undang yang sedia ada memadai atau tidak.

Kajian ini merupakan kajian perundangan yang menganalisis peruntukan undang-undang yang relevan dengan topik yang dikaji. Statut yang dirujuk ialah Enakmen Kesalahan Jenayah Syariah (EKJS). Perbuatan seperti persetubuhan luar nikah, khalwat dan mukadimah zina di bawah EKJS dilihat sebagai “pemula” kepada jenayah buang bayi (lihat seksyen 23, 27 dan 24 Akta Kesalahan Jenayah Syariah Wilayah-wilayah Persekutuan 1997)). Selain itu, kesalahan hamil luar nikah berdasarkan seksyen 50 Enakmen Jenayah Syariah (Perak) 1992 juga relevan untuk dikaji. Antara aspek yang dianalisis termasuklah peruntukan, elemen kesalahan dan hukuman di bawah Enakmen/Akta Kesalahan Jenayah Syariah negeri-negeri di Malaysia, di samping peruntukan yang berkaitan dengan hukuman perbuatan pendedahan, pembuangan dan pembunuhan bayi di bawah seksyen 299, 300, 302, 304(b), 307, 317 dan 318 Kanun Keseksaan (Akta 574). Selain Kanun Keseksaan, seksyen 31 Akta Kanak-kanak 2001 juga dikaji.

KES KELAHIRAN ANAK TAK SAH TARAF DAN PEMBUANGAN BAYI DI MALAYSIA

Kelahiran anak tak sah taraf atau anak luar nikah kini sudah menjadi isu dan penyumbang terbesar kes pembuangan dan pembunuhan bayi di Malaysia (Azizah, & Nor 'Adha, 2014). Kes tersebut sentiasa didedahkan oleh media, manakala jumlah wanita hamil luar nikah yang ditempatkan di pusat pemulihan semakin meningkat dari semasa ke semasa (Abd. Ghani & Nuarrual Hilal, 2016). Dalam kebanyakan kes, anak luar nikah yang dilahirkan akan dibuang atau dicampak dan diperlakukan dengan penuh tragis yang berakhir dengan kematian. Hal ini bagi menyembunyikan kelahiran anak tak sah taraf daripada pengetahuan umum yang menjadi bukti perlakuan maksiat yang dilakukan (Azizah, dan Nor 'Adha, 2014). Kini, isu pembuangan bayi bukan sahaja mendapat perhatian masyarakat dan negara, malah pada peringkat dunia. Jadual 1 menunjukkan perangkaan kes pembuangan bayi di seluruh Malaysia pada tahun 2010 hingga 2017.

Jadual 1 Statistik pembuangan bayi seluruh Malaysia
2010 – 2017.

Bil.	Tahun	Jumlah Kes
	2010	91
	2011	98
	2012	89
	2013	90
	2014	103
	2015	111
	2016	115
	2017	120
Jumlah Keseluruhan		817

(Sumber: Bahagian Siasatan Seksual Wanita dan Kanak-kanak (D11), Jabatan Siasatan, PDRM, Bukit Aman.)

Sepanjang tahun 2010 hingga Disember 2017, jumlah kes pembuangan bayi yang direkodkan adalah sebanyak 817 kes. Pada tahun 2010 sebanyak 91 kes dicatatkan, manakala pada tahun 2011 meningkat kepada 98 kes. Jumlah kes hanya menurun kepada 89 kes pada tahun 2012 dan jumlah kes meningkat semula pada tahun berikutnya, iaitu tahun 2013 hingga 2017, iaitu masing-masing mencatatkan sebanyak 90 kes, 103 kes, 111 kes, 115 kes dan 120 kes (www.astroawani.com 25 Julai 2017). Meskipun banyak program yang dilaksanakan oleh kerajaan dan badan bukan kerajaan (NGO) seperti menyediakan ruangan meninggalkan bayi, kes pembuangan bayi masih terus berlaku dan meningkat saban tahun.

Jadual 2 Statistik kes buang bayi mengikut pecahan hidup/mati mangsa
2013 – 2017.

Hidup/Mati	2013	2014	2015	2016	2017	Jumlah
Hidup	32	28	47	37	41	185
Mati	58	75	64	78	79	354
Jumlah	90	103	111	115	120	539

(Sumber: Bahagian Siasatan Seksual, Wanita dan Kanak-kanak (D11), Jabatan Siasatan, PDRM, Bukit Aman)

Jadual 2 menunjukkan kes pembuangan bayi mengikut pecahan hidup dan mati bagi tahun 2013 hingga tahun 2017. Dalam tempoh tersebut, kes bayi terbuang yang ditemui mati adalah sebanyak 354 kes berbanding dengan bayi terbuang yang ditemui hidup berjumlah 185 kes. Kebanyakan bayi terbuang yang ditemui mati disebabkan pelbagai faktor, antaranya bayi tersebut terdedah pada bahaya persekitaran kerana keadaan bayi yang masih lemah.

Populasi Anak Luar Nikah di Malaysia

Berdasarkan laporan rasmi Jabatan Pendaftaran Negara, sebanyak 532 158 kelahiran anak tak sah taraf didaftarkan dari tahun 2005 hingga 2015. Menurut Kementerian Kesihatan Malaysia, bilangan kes remaja hamil sebelum berkahwin bagi tahun 2012 hingga 2015 adalah sebanyak 16 270. Berdasarkan statistik remaja hamil Jabatan Kesihatan Negeri 2012 hingga 2015, tiga buah negeri yang mencatatkan statistik tertinggi yang melibatkan remaja berumur 10 hingga 19 tahun ialah Sarawak (5246 orang), Johor (2427 orang) dan Selangor (1603 orang) (*Bernama*, 10 November 2016).

Di Malaysia, kes kehamilan luar nikah merupakan punca utama berlakunya kes pembuangan bayi. Kenyataan ini disokong oleh kajian Lukman (2006) yang menunjukkan bahawa 90 peratus status bayi luar nikah menjadi faktor utama bayi dibuang. Secara logiknya, pasangan yang berkahwin secara sah tidak akan membuang bayi yang dilahirkan. Jika dihipit oleh faktor ekonomi atau ditinggalkan suami, bayi tersebut diserahkan kepada orang lain untuk dipelihara. Sebaliknya, wanita yang mengandung anak luar nikah berkemungkinan besar tidak menghendaki bayi berkenaan dan akan bertindak di luar batasan, termasuk membuang bayi mereka. Oleh sebab itu, agak sukar untuk mengesan pihak yang membuang bayi tersebut.

Intervensi Awal bagi Kehamilan yang Tidak Diingini

Di Malaysia, kerajaan memberikan pilihan kepada remaja hamil luar nikah sama ada tinggal di institusi perlindungan kerajaan atau yang dikendalikan oleh pihak badan bukan kerajaan seperti Raudatus Sakinah. Mereka juga boleh mendaftarkan anak yang bakal lahir

kepada keluarga angkat berdasarkan Akta Pendaftaran Pengangkatan Anak 1952 ataupun remaja itu diletakkan di bawah jagaan ibu bapa di rumah. Kerajaan juga memulakan kempen berhubung dengan seksualiti untuk memerangi jenayah buang bayi pada peringkat sekolah. Kementerian Pendidikan Malaysia (KPM) pula mempunyai tujuh program yang merangkumi Dasar Negara dan Pelan Tindakan Pendidikan Kesihatan Reproduksi dan Sosial (PKRS) yang diperkenalkan pada tahun 2009. Program ini diperkenalkan pada tahun 2012 sebagai aktiviti kokurikulum di sekolah yang menyasarkan pelajar Tahun Enam, Tingkatan Tiga dan Pendidikan Khas. Seramai 2376 pelajar dari 33 sekolah mengambil bahagian dalam program ini. Projek tersebut kemudiannya dilaksanakan pada tahun 2014 menerusi latihan dan kursus di tiga buah sekolah rendah, menengah dan sekolah pendidikan khas pada bulan September 2014 (n. n., 2014). Terdapat juga usaha untuk mencegah pembuangan bayi oleh NGO dengan cara melindungi remaja yang hamil luar nikah sehingga bayi dilahirkan. Antara tempat perlindungan tersebut termasuklah Raudatus Sakinah, KEWAJA, Darul Wardah, dan lain-lain (Rumah Perlindungan untuk Wanita, 2012). Selain itu, Orphan Care (salah sebuah NGO) turut memperkenalkan kemudahan *Baby Hatch* pada tahun 2010 untuk mengurangkan kes pembuangan bayi. Kemudahan ini menyediakan tempat yang selamat untuk meletakkan bayi yang tidak diingini (Orphan Care Children, 21 Julai 2016). Walaupun terdapat perdebatan bahawa tempat perlindungan ini seolah-olah menggalakkan perbuatan zina dan lebih ramai bayi dibuang, setakat ini tiada kajian yang dilakukan bagi membuktikan perkara tersebut. Kewujudan *Baby Hatch* ini boleh dikatakan sebagai suatu usaha kerajaan untuk mengurangkan kes pembuangan bayi di tempat yang tidak selamat walaupun pernah menimbulkan kontroversi daripada pelbagai pihak.

Jenayah buang bayi ini juga bertentangan dengan Konvensyen mengenai Hak Kanak-kanak (*Convention on the Rights of the Child* (CRC)) dan Malaysia adalah antara negara yang menandatangani konvensyen tersebut. Pembuangan bayi melanggar peruntukan perkara 7 CRC yang menyatakan bahawa setiap kanak-kanak mempunyai hak sejak lahir, termasuk untuk mengetahui dan dijaga

oleh ibu bapanya. Perbuatan tersebut turut melanggar hak sedia ada untuk hidup di bawah perkara 6 dan hak untuk dilindungi daripada segala bentuk keganasan di bawah perkara 19 CRC (Wickneswaran, 2005).

Kementerian Pembangunan Wanita Keluarga dan Masyarakat (KPWK) bekerjasama dengan Orphan Care sejak tahun 2010 untuk mewujudkan intervensi formal menerusi penubuhan pusat perlindungan alternatif *Baby Hatch* bagi mencegah perbuatan buang bayi di Malaysia. Selain itu, salah satu pendekatan yang lebih proaktif dilaksanakan apabila klasifikasi ‘‘kanak-kanak yang memerlukan perlindungan dan pemeliharaan’’ diwujudkan di bawah Akta Kanak-kanak 2001 (Akta 611) sebagai tanda aras intervensi formal oleh pihak kerajaan (Jal Zabdi, 2007).

MENANGANI JENAYAH BUANG BAYI: BAGAIMANAKAH ENAKMEN JENAYAH SYARIAH MEMBENDUNGNYA

Kesalahan di bawah seksyen 23, 24 dan 27 Akta Kesalahan Jenayah Syariah (Wilayah-wilayah Persekutuan) 1997, iaitu persetubuhan luar nikah, mukadimah zina dan khalwat merupakan akta yang mencegah keterlanjuran pasangan yang tidak berkahwin kerana perbuatan tersebut merupakan suatu dosa dalam Islam. Oleh sebab itu, agama Islam menyeru umatnya menghindari maksiat dan anggota masyarakat pula menjalankan peranannya menyuruh ke arah kebaikan dan mencegah kemungkaran (Siti Zubaidah & Muhammad Zahiri, 2007). Bagi mencegah perbuatan maksiat, usaha penguatkuasaan terhadap kesalahan khalwat, mukadimah zina, persetubuhan luar nikah, dan kesalahan lain yang menyumbang kepada perbuatan buang bayi perlu digiatkan.

1. Persetubuhan Luar Nikah

Persetubuhan dan kehamilan luar nikah merupakan faktor utama berlakunya kes pembuangan bayi, serta persetubuhan dan kehamilan luar nikah. Seksyen 23 Akta Kesalahan Jenayah Syariah (Wilayah-wilayah Persekutuan) 1997 memperuntukkan kesalahan ini seperti yang berikut:

1. Mana-mana orang lelaki yang melakukan persetubuhan dengan orang perempuan yang bukan isterinya yang sah adalah melakukan suatu kesalahan dan apabila disabitkan boleh didenda tidak melebihi RM5000 atau dipenjarakan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

(a) Mana-mana orang perempuan yang melakukan persetubuhan dengan orang lelaki yang bukan suaminya yang sah adalah melakukan suatu kesalahan dan apabila disabitkan boleh didenda tidak melebihi RM5000 atau dipenjarakan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana hukuman itu.

(b) Hakikat bahawa seorang perempuan hamil luar nikah akibat persetubuhan yang dilakukan dengan kerelaannya ialah keterangan *prima facie* tentang perlakuan kesalahan di bawah subseksyen (2) oleh orang perempuan itu.

(c) Bagi maksud subseksyen (3), mana-mana orang perempuan yang melahirkan anak yang sempurna sifatnya dalam tempoh yang kurang daripada enam bulan qamariah dari tarikh pernikahannya hendaklah disifatkan telah hamil luar nikah.

Peruntukan ini juga terdapat dalam enakmen kesalahan jenayah syariah semua negeri. Dalam kes *Pendakwa Syarie lwn Noor Wahida bt. Ahmad Azri* [2013] 3 *ShLR* tertuduh didakwa melakukan perbuatan sebagai persediaan untuk melakukan persetubuhan luar nikah. Tertuduh ditangkap dengan pasangannya di dalam sebuah kereta di kawasan pantai Besut, Terengganu. Semasa ditangkap, kedua-dua tertuduh perempuan dan lelaki berada di tempat duduk belakang kereta dengan hanya berbaju tanpa memakai sebarang seluar dan semasa ditangkap kedua-duanya menggunakan tangan untuk menutup kemaluan masing-masing. Tertuduh membuat pengakuan bersalah dan memohon kepada mahkamah agar bayaran denda dikurangkan kerana beliau seorang pelajar. Hakim memerintahkan agar tertuduh ditahan di Pusat Perlindungan Wanita Baitul Ehsan

Selangor selama enam bulan. Dalam kes *Pendakwa Mahkamah Syariah Perak lwn Dewi* [1409] *Jurnal Hukum*, tertuduh berjaya menyembunyikan kehamilan dan hanya ditangkap selepas anak dilahirkan. Dia dituduh melakukan persetubuhan dengan seorang lelaki yang bukan suaminya hingga menyebabkan kelahiran anak. Tertuduh disabitkan kesalahan di bawah seksyen 155(3) Undang-undang Pentadbiran Agama Islam (Perak) 1965 dan dihukum denda RM500 atau penjara enam bulan. Dalam kes *Pendakwa Mahkamah Syariah Perak lwn Fatima* [1407] *Jurnal Hukum* pula, tertuduh dituduh melakukan kesalahan zina, mengaku melahirkan seorang anak dan tidak pernah bernikah. Mahkamah memutuskan denda RM300 atau tiga bulan penjara.

2. Mukadimah Zina

Mukadimah zina ialah perbuatan yang dilakukan sebagai persediaan atau percubaan melakukan persetubuhan luar nikah. Seksyen 24 Akta Kesalahan Jenayah Syariah (Wilayah-wilayah Persekutuan) 1997 memperuntukkan seperti yang berikut:

Mana-mana orang yang melakukan apa-apa perbuatan sebagai persediaan untuk melakukan persetubuhan luar nikah melakukan suatu kesalahan dan apabila disabitkan boleh didenda tidak melebihi RM3000 atau dipenjarakan selama tempoh tidak melebihi dua tahun atau kedua-duanya.

Dalam kes *Pendakwa Syarie lwn Wan Mohd. Faizdehar bin Wan Abdullah* [2012] 3 *ShLR*, kedua-dua tertuduh mengaku salah melakukan perbuatan sebagai persediaan untuk melakukan persetubuhan luar nikah. Semasa tangkapan dilakukan, keadaan pakaian luar dan pakaian dalam tertuduh didapati terlondeh, manakala tertuduh perempuan hanya memakai baju sahaja dan tidak memakai seluar semasa kejadian. Yang Arif Hakim yang membuat ulasan penghakiman memberikan peringatan kepada tertuduh agar tidak mengulangi perbuatan tersebut. Kesalahan ini dianggap sebagai pemula kepada jenayah yang lebih berat, iaitu kelahiran anak luar nikah dan juga pembuangan bayi.

3. Khalwat

Khalwat merupakan pemula kepada kesalahan jenayah syariah yang berkaitan dengan seksual seperti mukadimah zina, persetubuhan luar nikah dan seterusnya hamil luar nikah (Siti Zubaidah, 2016; Ramizah, 2015). Kesalahan khalwat terkandung di bawah seksyen 27 Akta Kesalahan Jenayah Syariah (Wilayah-wilayah Persekutuan) 1997 seperti yang berikut:

Mana-mana-

- a. Orang lelaki yang didapati berada bersama-sama seorang atau lebih daripada seorang perempuan yang bukan isteri atau mahramnya; atau
- b. Orang perempuan yang didapati berada bersama-sama dengan seorang atau lebih daripada seorang lelaki yang bukan suami atau mahramnya, di mana-mana tempat yang terselindung atau di dalam rumah atau bilik dalam keadaan yang boleh menimbulkan syak bahawa mereka sedang melakukan perbuatan yang tidak bermoral adalah melakukan suatu kesalahan dan apabila disabitkan boleh didenda tidak melebihi RM3000 atau dipenjarakan selama tempoh tidak melebihi dua tahun atau kedua-duanya.

Elemen kesalahan khalwat ini didapati boleh mencegah mana-mana pasangan daripada berdua-duaan di tempat sunyi kerana perbuatan tersebut mengundang perlakuan zina jika tidak dibendung dari awal lagi. Dalam kes *Pendakwa Syarie lwn Mohd. Nabil bin Ramli* [2015] 3 *ShLR*, dua orang perempuan didapati bersekediaman dengan dua orang lelaki di dalam sebuah rumah. Rumah tersebut merupakan tempat tinggal kedua-dua pasangan dan setiap pasangan lelaki dan perempuan berkongsi satu bilik tanpa hubungan mahram dan juga bukan suami isteri yang sah dari segi hukum syarak. Tertuduh didakwa dan mengaku salah atas kesalahan khalwat mengikut seksyen 27(a) Akta Kesalahan Jenayah Syariah (Wilayah-wilayah Persekutuan) 1997. Yang Arif Hakim dalam kes ini menjelaskan bahawa tujuan hukuman tersebut dijatuhkan adalah untuk menyedarkan, memberikan pengajaran dan menginsafkan tertuduh, di samping menjadi pengajaran kepada orang awam supaya tidak melakukan kesalahan yang sama. Hakim juga mengulas bahawa tertuduh semasa

melakukan kesalahan tersebut mengetahui bahawa tindakan mereka salah dan mengetahui risiko yang akan menyimpannya, jika berterusan melakukan kesalahan tersebut. Oleh itu, jika penguatkuasaan bagi membanteras perbuatan yang tidak bermoral ini dapat digiatkan dan masyarakat peka dan memainkan peranan masing-masing, nescaya perkara yang lebih memudaratkan dapat dielakkan.

4. Hamil Luar Nikah

Kesalahan hamil luar nikah menjadi suatu kesalahan di tujuh negeri sahaja, iaitu di Negeri Sembilan, Sabah, Melaka, Perlis, Perak, Pahang dan Kelantan. Di Perak, seksyen 50 Enakmen Jenayah Syariah (Perak) 1992 memperuntukkan:

- (a) Seseorang perempuan yang hamil atau melahirkan bayi di luar nikah akibat persetubuhan haram yang dilakukan dengan kerelaannya dan kesedarannya melakukan suatu kesalahan dan hendaklah, apabila disabitkan, dikenakan hukuman denda tidak melebihi RM3000 atau penjara selama tempoh tidak melebihi dua tahun, atau kedua-duanya.
- (b) Seseorang perempuan yang melahirkan seorang bayi yang cukup sifatnya dalam masa enam bulan selepas dia berkahwin hendaklah disifatkan sebagai melahirkan anak luar nikah.
- (c) Dengan syarat bahawa beban membuktikan seorang perempuan itu telah disetubuhi dengan cara syubhah atau telah berkahwin atau anak itu dilahirkan dalam jangka masa yang boleh diterima mengikut hukum syarak adalah terletak atas perempuan itu.

Peruntukan tentang kesalahan hamil luar nikah dan beberapa contoh kes yang pernah diputuskan oleh hakim yang menegaskan risiko kehamilan luar nikah, dan sebagainya, jelas menunjukkan bahawa undang-undang syariah yang sedia ada sudah mencukupi sekiranya dijadikan panduan dan peringatan kepada semua pihak. Oleh itu, pendedahan dan kempen kesedaran undang-undang syariah perlu dilaksanakan pada semua peringkat masyarakat.

UNDANG-UNDANG SIVIL: HUKUMAN BAGI KESALAHAN MEMBUNUH SEBAGAI IMPLIKASI PERBUATAN MEMBUANG BAYI

Kebanyakan kes pembuangan bayi di negara ini berakhir dengan kematian bayi. Seksyen 46 Kanun Keseksaan mendefinisikan perkataan “kematian” sebagai kematian seorang manusia, melainkan jika akasnya ternampak daripada kandungan ayatnya. Seksyen 45 pula mendefinisikan “nyawa” sebagai nyawa seorang manusia, melainkan jika akasnya ternampak daripada kandungan ayatnya. Berdasarkan definisi “kematian” dan “nyawa”, maka jelaslah bahawa bayi yang baru dilahirkan juga termasuk dalam golongan manusia yang bernyawa.

Perbuatan Buang Bayi sebagai Kesalahan Membunuh: Seksyen 317 dan 318 Kanun Keseksaan

Perbuatan membuang bayi yang tidak diingini sama ada yang masih hidup atau telah mati selepas dilahirkan merupakan suatu usaha untuk menyembunyikan kelahiran yang berlaku dan mengelak untuk dipertanggungjawabkan terhadap perbuatan hamil luar nikah, dan sebagainya. Walaupun wanita atau si ibu yang melahirkan bayi tersebut tetapi bayi itu boleh jadi dibuang oleh pihak lain seperti teman lelaki atau penjaga atau ibu bapa wanita tersebut. Dalam kes ini, beberapa perkara perlu dipertimbangkan sebelum mendakwa seseorang dengan mana-mana kesalahan di bawah Kanun Keseksaan.

Pada asasnya, seksyen 317 relevan untuk digunakan dalam konteks pembuangan bayi sama ada yang menyebabkan kematian atau tidak:

Barang siapa, yang menjadi bapa atau ibu seorang kanak-kanak yang berumur kurang daripada 12 tahun, atau yang bertanggungjawab menjaga kanak-kanak itu, mendedahkan atau meninggalkan kanak-kanak itu dengan niat hendak membuang kanak-kanak itu sama sekali, hendaklah diseksa dengan penjara selama tempoh yang boleh sampai tujuh tahun, atau dengan denda, atau dengan kedua-duanya.

Peruntukan dalam seksyen 317 boleh diguna pakai dalam semua kes pengabaian kanak-kanak yang kurang dari 12 tahun, termasuk bayi yang baru dilahirkan. Perbuatan atau elemen “mendedahkan atau meninggalkan kanak-kanak dengan niat hendak membuang kanak-kanak itu sama sekali”, termasuk perbuatan membuang atau meninggalkan bayi begitu sahaja di pelbagai tempat seperti di dalam longkang, tong sampah dan juga di hadapan rumah ibadat. “Pendedahan” bermaksud meninggalkan seseorang secara fizikal di luar dan kemungkinan terdedah kepada bahaya persekitaran dan boleh mengakibatkan kematian atas faktor keupayaan diri bayi yang ditinggalkan (Ling, Teoh, & Nizam (Eds.), 2001). “Pendedahan” juga bermaksud meletakkan dan mendedahkan bayi kepada bahaya atau risiko yang memudaratkan atau kecederaan tubuh badan, dan faktor persekitaran yang terbuka atau meletakkan bayi di suatu tempat dan bayi tersebut tidak dilindungi sebagai suatu keperluan seorang kanak-kanak. Sebagai contoh, meletakkannya di luar rumah dan terdedah kepada risiko iklim, binatang buas, dan sebagainya. Akibat pendedahan tersebut, bahaya boleh terjadi dengan segera (Mulla & Gupta, 1988).

Seksyen ini menjelaskan bahawa perbuatan tersebut mesti dilakukan oleh ibu, bapa atau penjaga kanak-kanak tersebut. Dalam kes *Fatimah lwn Public Prosecutor* [1996] 558 *MLJU* 1, perayu disabitkan dengan kesalahan mendedahkan dan meninggalkan anaknya, dan dikenakan hukuman penjara selama empat tahun. Dia mengaku meninggalkan anak tersebut berhampiran dengan sawah padi kerana takut akan bapanya kerana beliau masih belum berkahwin. Perayu membuat rayuan terhadap tempoh hukuman penjara dan mahkamah mengurangkan hukuman kepada sembilan bulan setelah mengambil kira keseluruhan fakta kes.

Perbuatan yang lebih tidak berperikemanusiaan seperti melahirkan, serta menyembunyikan kelahiran dan kematian bayi dengan mengebumikan secara sulit boleh ditangani menerusi seksyen 318 Kanun Keseksaan yang memperuntukkan:

Barang siapa dengan sengaja menyembunyikan kelahiran seorang kanak-kanak dengan jalan mengebumikan atau membuang mayat kanak-kanak itu dengan sulit, sama ada kanak-kanak itu

mati sebelum atau selepas atau semasa dilahirkan hendaklah diseksa dengan penjara selama tempoh dua tahun atau denda atau dengan kedua-duanya sekali.

Meskipun terdapat dua peruntukan khusus dalam Kanun Keseksaan bagi mendakwa, mensabitkan dan menghukum pesalah yang terlibat dengan perbuatan membuang bayi sama ada sehingga menyebabkan kematian atau tidak, namun, hukuman tersebut masih tidak memadai untuk menangani kes buang bayi dan wajar ditingkatkan. Oleh itu, cadangan untuk menyiasat kes buang bayi sebagai kes bunuh wajar dilaksanakan supaya hukuman yang lebih berat boleh dipertimbangkan.

Bagi kes bunuh, terdapat dua peruntukan yang boleh digunakan, iaitu seksyen 299 bagi kesalahan mematikan orang dengan salah dan seksyen 300, iaitu kesalahan membunuh orang. Seksyen 299 menyatakan:

Barang siapa yang menyebabkan kematian dengan melakukan suatu perbuatan dengan niat hendak menyebabkan kematian atau dengan niat menyebabkan suatu bencana tubuh yang mungkin menyebabkan kematian atau dengan mengetahui bahawa ia mungkin dengan jalan perbuatan itu menyebabkan kematian adalah melakukan kesalahan mematikan orang dengan salah.

Sementara itu, hukuman bagi kesalahan di bawah seksyen 299 terletak di bawah seksyen 304 Kanun Keseksaan yang memperuntukkan hukuman penjara maksimum sehingga 30 tahun atau denda atau kedua-duanya, jika sabit kesalahan. Jika disabitkan dengan kesalahan membunuh di bawah seksyen 300, maka hukuman mati boleh dikenakan. Kesalahan membunuh orang mengikut seksyen 300 menyatakan:

- (a) jika perbuatan yang menyebabkan kematian itu dilakukan dengan niat hendak menyebabkan kematian;
- (b) jika perbuatan itu dilakukan dengan niat hendak menyebabkan sesuatu bencana tubuh yang pesalah itu ketahui mungkin menyebabkan kematian orang yang dikenakan bencana itu;

- (c) jika perbuatan itu dilakukan dengan niat hendak menyebabkan bencana tubuh kepada mana-mana orang, dan bencana tubuh yang dimaksudkan hendak dikenakan itu adalah cukup, pada lazimnya, bagi menyebabkan kematian; atau
- (d) jika orang yang melakukan perbuatan itu ketahui bahawa perbuatan itu adalah berbahaya sehingga boleh menyebabkan kematian, atau sesuatu bencana tubuh yang mungkin menyebabkan kematian, dan dia melakukan perbuatan itu dengan tiada apa-apa sebab bagi mendatangkan bahaya menyebabkan kematian, atau bencana sebagaimana tersebut itu.

Kesalahan di bawah Akta Kanak-kanak 2001

Akta Kanak-kanak 2001 menjadi rujukan utama kerana peruntukannya lebih khusus kepada perbuatan membuang bayi, khususnya seksyen 31(1)(a) dan seksyen 31(5)(b) dan hukumannya juga berat. Seksyen 31 tersebut menyatakan:

31.(1) mana-mana orang yang merupakan orang yang mempunyai pemeliharaan seseorang kanak-kanak:

- (a) yang menganiayai, mengabaikan, membuang atau mendedahkan kanak-kanak itu dengan cara yang mungkin akan menyebabkannya mengalami kecederaan fizikal atau emosi atau yang menyebabkan atau membenarkannya dianiayai, diabaikan, dibuang atau didedahkan sedemikian; atau
- (b) yang menganiayai dari segi seks kanak-kanak itu atau yang menyebabkan atau membenarkannya dianiayai sedemikian. melakukan suatu kesalahan dan apabila disabitkan boleh didenda tidak melebihi RM20 000 atau dipenjarakan selama tempoh tidak melebihi 10 tahun atau kedua-duanya.

(2) mahkamah-

- (a) hendaklah, sebagai tambahan kepada apa-apa hukuman yang dinyatakan dalam subseksyen (1), memerintahkan supaya orang yang disabitkan atas suatu kesalahan di bawah subseksyen itu menyempurnakan suatu bon dengan penjamin untuk berkelakuan baik selama apa-

- apa tempoh yang difikirkan patut oleh mahkamah; dan
- (b) boleh memasukkan dalam bon yang disempurnakan di bawah perenggan (a) apa-apa syarat yang difikirkan patut oleh mahkamah.
- (3) Jika seseorang yang diperintahkan supaya menyempurnakan suatu bon untuk berkelakuan baik di bawah subseksyen (2) tidak mematuhi mana-mana syarat bon itu, dia boleh didenda selanjutnya tidak melebihi RM10 000 atau dipenjarakan selanjutnya selama tempoh tidak melebihi lima tahun atau kedua-duanya.
 - (4) Seseorang ibu atau bapa atau penjaga atau orang lain yang bertanggung di sisi undang-undang untuk menyara seorang kanak-kanak hendaklah disifatkan mengabaikannya dengan cara yang mungkin akan menyebabkannya mengalami kecederaan fizikal atau emosi, jika sungguhpun dia berupaya mengadakan makanan, pakaian, rawatan perubatan atau pergigian, penginapan atau pemeliharaan yang mencukupi bagi kanak-kanak itu daripada sumbernya sendiri, dia tidak berbuat demikian.
 - (5) Seseorang boleh disabitkan atas suatu kesalahan terhadap seksyen ini walaupun-
 - (a) penderitaan atau kecederaan kepada kesihatan kanak-kanak yang berkenaan atau kemungkinan penderitaan atau kecederaan kepada kesihatan kanak-kanak yang berkenaan telah dielakkan melalui tindakan orang lain; atau
 - (b) kanak-kanak yang berkenaan telah mati.

Berdasarkan seksyen di bawah Akta Kanak-kanak 2001, hukuman perbuatan ini adalah lebih berat kerana memperuntukkan hukuman denda maksimum RM20 000 atau penjara sehingga 10 tahun, atau kedua-duanya jika sabit kesalahan. Walaupun diputuskan bahawa kes buang bayi tidak lagi disiasat di bawah Akta Kanak-kanak 2001 seperti yang dilaporkan (*Berita Harian*, 12 Ogos 2010),

namun bagi kes buang bayi yang tidak menyebabkan kematian, termasuk membuangnya di *Baby Hatch*, maka seksyen 31 masih relevan digunakan.

ANALISIS: SEJAUH MANAKAH MEKANISME PERUNDANGAN DAPAT MENANGANI JENAYAH BUANG BAYI DI MALAYSIA

Berdasarkan perbincangan, dirumuskan bahawa kedua-dua sistem sivil dan syariah memperuntukkan hukuman terhadap kesalahan jenayah buang bayi yang bertujuan mencegah pesalah dan sebagai pengajaran kepada masyarakat. Walaupun undang-undang sedia ada dilihat mencukupi, namun jika proses sosialisasi undang-undang syariah tidak dilakukan secara meluas, maka kuranglah peringatan untuk mencegah perbuatan yang mungkar. Seterusnya, jelas bahawa peruntukan yang terdapat di bawah enakmen kesalahan jenayah syariah bersifat mencegah jenayah menerusi peruntukan kesalahan “pemula” yang berkaitan dengan tatasusila, seperti larangan berkhalwat, percubaan persetubuhan haram, perbuatan tidak sopan dan bersekedudukan. Semua perbuatan ini dilihat sebagai pencetus dan pemula kepada kesalahan yang lebih berat, jika gagal dicegah. Hukuman kepada pemula jenayah buang bayi dan bunuh bayi seperti kesalahan khalwat, mukadimah zina, dan sebagainya perlu ditingkatkan. Begitu juga dengan penguatkuasaan dan pelaksanaan *amar makruf nahi munkar* oleh anggota masyarakat dengan membuat laporan perbuatan yang diketahui atau disyaki kepada pegawai penguat kuasa agama. Oleh sebab hukuman yang dikenakan kepada setiap pesalah tidak setimpal, maka dicadangkan agar peruntukan undang-undang terhadap pesalah zina dipinda dan dikaji semula dengan memasukkan hukuman yang lebih berat agar masalah pembuangan bayi ini dapat dibendung. Selaras dengan perkembangan semasa ke arah meningkatkan kadar hukuman di bawah Akta Mahkamah Syariah (Bidang Kuasa Jenayah) 1965 (Pindaan 1984) (Akta 355), maka berkemungkinan besar, pindaan ini dapat membendung perlakuan yang akhirnya membawa perbuatan zina, kelahiran anak luar nikah dan pembunuhan bayi di Malaysia.

Dalam konteks undang-undang sivil, penyiasatan kes buang bayi di bawah seksyen 299 Kanun Keseksaan sebagai kesalahan mematkan orang dengan salah boleh dibuat kerana elemennya lebih umum dan pembuktian kematian bayi yang dibuang berpunca daripada perbuatan pelaku membuang bayi berkenaan dan bukan sebab lain. Kewujudan niat (hendak menyebabkan kematian atau dengan niat hendak menyebabkan sesuatu bencana tubuh yang mungkin menyebabkan kematian, atau dengan mengetahui bahawa mungkin dengan jalan perbuatan itu menyebabkan kematian) boleh dibuktikan dengan mengaitkannya dengan tempat bayi itu dibuang dan risiko yang dialami oleh bayi berkenaan. Bagi melindungi bayi yang terbuang, *Baby Hatch* merupakan penyelesaian sementara untuk memberikan perlindungan alternatif, dan seterusnya memperkasakan hak kanak-kanak seperti yang digariskan di bawah CRC pada peringkat antarabangsa, demi menjaga kepentingan awam dan nyawa manusia.

KESIMPULAN

Salah laku seksual dan kehamilan luar nikah dapat diklasifikasikan sebagai isu global yang menarik perhatian masyarakat di seluruh dunia dengan lahirnya pelbagai sokongan sosial sama ada berbentuk perlindungan, pendidikan, pencegahan dan pemulihan. Terdapat pelbagai faktor yang mendorong perlakuan seks bebas tanpa nikah dalam kalangan remaja sehingga mengakibatkan kehamilan. Faktor tersebut berkait rapat dengan corak pendidikan, latar belakang keluarga dan remaja, rakan sebaya, media massa dan juga masyarakat. Salah laku ini bukan sahaja memberikan kesan kepada remaja dan juga bayi yang bakal dilahirkan, malahan mengakibatkan pelbagai jenayah lain yang lebih serius seperti pengabaian, penganiayaan, pembuangan dan pembunuhan bayi secara kejam. Secara umumnya, didapati bahawa undang-undang yang sedia ada memadai sama ada dalam kerangka undang-undang sivil mahupun syariah, tetapi usaha memasyarakatkannya perlu digiatkan bersama-sama kempen kesedaran tentang implikasi pergaulan bebas, zina dan perlakuan sumbang di luar nikah agar kes buang bayi ini dapat dibendung daripada berleluasa di Malaysia.

RUJUKAN

- Abd. Ghani Ahmad, & Nuarrual Hilal Md. Dahlan. (2016). Kewajipan menanggung nafkah anak tak sah taraf: Satu kajian kes di negeri Kedah. *Kanun: Jurnal Undang-undang Malaysia*, 28(2), 215.
- Adesiyun, Adeboye, Saka, Abdul Kadir, Oloko, Lawal, & David. (2010). Successful outcome of an abandoned baby infested with maggots. *Injury Prevention*, 16 (Suppl 1), A141.
- Akta Pendaftaran Pengangkatan Anak 1952.
- Ainul Bashirah Ismail, Zuliza Mohd. Kusrin, & Mat Noor Mat Zain. (2012). Kesalahan khalwat dan perbuatan tidak sopan dan hukumannya menurut Islam. *Jurnal Hadhari*, 4(2), 65 – 88.
- Akta Kanak-kanak 2001.
- Akta Kesalahan Jenayah Syariah (Wilayah-wilayah Persekutuan) 1997 (Akta 559).
- Akta Mahkamah Syariah (Bidang Kuasa Jenayah) 1965 (Pindaan 1984) (Akta 355).
- Akta Pentadbiran Undang-undang Islam (Wilayah-wilayah Persekutuan) 1993.
- Anita Abdul Rahim, Adibah Abdul Rahim, & Nazura Abdul Manap. (2012). Hukuman bagi kesalahan seksual di bawah Enakmen Jenayah Syariah Negeri Sembilan 1992: Keperluan kepada hukuman yang lebih berat. *Jurnal Undang-undang dan Masyarakat*, 16, 29 – 42.
- Anita Abdul Rahim, Ahmad Azam Mohd. Shariff, & Ruzian Markom. (2010). Hukuman sebat menurut Akta 355: Sejauh manakah aplikasinya dalam kes-kes jenayah syariah di Malaysia? *Shariah Law Reports*, 3, 79.
- Anita Abdul Rahim, Nazura Abdul Manap, & Ramalinggam Rajamanickam. (2009). *Isu-isu Perundangan di Malaysia: Satu Anjakan Paradigma*. Bangi: Fakulti Undang-undang, Universiti Kebangsaan Malaysia.
- Anita Abdul Rahim, Tengku Noor Azira, Tengku Zainudin, & Ahmad Azam Mohd. Sharif. (2012). Curbing the problem of baby dumping and infanticide: A Malaysian legal perspective. *The International Journal of Humanities and Social Science*. 2(2), 173 – 177.
- Azizah Mat Rashid, & Nor ‘Adha Abdul Hamid. (2014). Kajian awal kerangka undang-undang sedia ada bagi anak tak sah taraf. *E-Jurnal Penyelidikan dan Inovasi*, (1), 84 – 99.
- Azizah Mohammad. (2007). *Protection and adoption of abandoned children in Malaysia*. Petaling Jaya: ILBS.
- Azizah Mohd., & Alhaji Umar Alkali. (2015). Crime of baby dumping: A

- review of Islamic, Malaysian and Nigerian laws. *Pertanika Journal of Social Science & Humanities*, 23(s), 67 – 82.
- Azrin Ibarahim. (2015). Kepentingan hisbah dan amalannya di Malaysia. *Jurnal Islam dan Masyarakat Kontemporari*, 11, 32.
- Badariah Sahamid. (1981). *Kezaliman terhadap Isteri dan Anak*. Paper presented at Seminar Wanita dan Undang-undang, Sesi Tiga (25 Ogos 1981). Persatuan Wanita Universiti, Universiti Malaya.
- Bernamea. (2014, 19 Jun). 26 Kes Buang Bayi Dilaporkan Suku Pertama 2014. *Berita Harian*.
- Bernamea. (2014, 19 Jun) 26 baby dumping cases in the 1st quarter of this year. *New Straits Times Online*. Retrieved from <http://dev.nst.com.my/node/4351?d=1>.
- Bernamea. (2015, 4 April). 517 baby dumping cases since 2005. Retrieved from <http://www.themalaysianinsider.com/malaysia/article/517-baby-dumping-cases-since-2005/>.
- Effandi Nazilah Abdullah. (2014, 8 Disember). Isu khalwat dari perspektif agama dan sosial dalam prosiding dan tatatertib. Retrieved from <http://agc-blog.agc.gov.my/agc-blog/?p=1107>.
- Enakmen Jenayah Syariah (Negeri Sembilan) 1992.
- Enakmen Jenayah Syariah (Perak) 1992.
- Enakmen Jenayah Syariah (Selangor) 1995.
- Enakmen Kanun Jenayah Syariah (Kelantan) 1985.
- Eva Susanti. (2000). Pentingnya pendidikan seks untuk remaja dan implikasinya bagi pencegahan HIV/AIDS. *SIGAI, Jurnal Sosiologi*, 1(1), 50 – 62.
- Farid Sufian Shuaib, Tajul Aris Ahmad Bustami, & Mohd. Hisham Mohd Kamal. (2001). *Administration of Islamic law in Malaysia: Text and material*. Kuala Lumpur: Malayan Law Journal.
- Farid Sufian Shuib. (2011). Administration of shariah criminal justice under the Malaysian constitutional framework: Issues and suggestion. *Malayan Law Journal*, 6, i – xvi.
- Farid Sufian Shuib. (2015). Isu perlembagaan dan hak asasi manusia dalam pentadbiran keadilan jenayah syariah. *Kanun: Jurnal Undang-undang Malaysia*, 27(1), 35.
- Fatimah lwn Public Prosecutor [1996] 558 *MLJU* 1.
- Gerben Bruinsma *et al.* (2004). *Punishment, place and perpetrators: Development in criminology and criminal justice research*. Devon, UK: Willan Publication.
- Hashim Bedu, Khairulhelmi Katip, & Mohd. Fahmi Mohd. Sahid. (2008).

Keruntuhan akhlak dan gejala sosial dalam keluarga: Isu dan cabaran. Paper presented at Seminar Kaunseling Keluarga, Fakulti Pendidikan, Universiti Teknologi Malaysia.

<http://www.astroawani.com/berita-malaysia/selangor-catat-kes-pembuangan-bayi-tertinggi-rohani-150358>

<http://www.islam.gov.my/perananpenguatkuasaan-syariah-dalam-membendung-gejala-pembuangan-bayi>.

J. Andenaes. (1996). The general preventive effects of punishment. *University of Pennsylvania Law Review*, 114(7), 949 – 983.

Jal Zabdi Mohd. Yusoff. (2007). *Aspek pencegahan dalam undang-undang perlindungan kanak-kanak di Malaysia* (Unpublished doctoral thesis). Fakulti Undang-undang, Universiti Malaya.

Kanun Keseksaan (Akta 574).

Khadijah Alavi, Salina Nen, Fauziah Ibrahim, Noremy Md. Akhir, Mohd. Suhaimi Mohamad, & Noorhasliza Mohd. Nordin. (2012). Hamil luar nikah dalam kalangan remaja. *Journal of Social Sciences and Humanities*, 7(1), 131 – 140.

Lukman Z. Mohamad. (2006). *Children in prostitutions: A study of young women in the rehabilitation centres in Malaysia* (Unpublished doctoral thesis). Fakulti Sains Pembangunan, Universiti Kebangsaan Malaysia.

M. Tonry (Ed.). (2001). *Penal reform in overcrowded times*. Oxford: Oxford University Press.

M. Wright. (1996). *Justice for victims and offenders: A restorative response to crime*. United Kingdom: Waterside Press.

Manap, & Ramalinggam Rajamanickam. (2009). *Isu-isu perundangan di Malaysia: Satu anjakan paradigma*. Bangi: Fakulti Undang-undang.

Mohd. Al-Adib Samuri. (2012). Teori pencegahan sebagai justifikasi hukuman: Analisis perbandingan antara perundangan sivil dan Islam. *Islamiyyat*, 34, 131 – 143.

Mohd. Faizol bin Zainal Iwn Suhaila bt. Yusoff [2014] 2 *ShLR* 83 – 103.

Mustafa Afifi Ab. Halim, Mohd. Mahyeddin Mohd. Salleh, Rezki Perdani Sawai, Nurhafizah Muhd. Shukor, Dini Farhana Baharuddin, Joki Perdani Sawai, & Abd. Halim Mohd. Hussin. (2013). Bayi yang dibuang: Hak dan kedudukan bayi di sisi undang-undang. *Malayan Law Journal*, 5, 5 – 10.

Noor ‘Asyikin *et al.* (2015). Khalwat dalam kalangan remaja di Malaysia dan Aceh: Kajian terhadap pematuhan syariah. *Kanun: Jurnal Undang-undang Malaysia*, 27(2), 304.

n.n. (2010, 2 Julai). Takut, Malu Punca Remaja Buang Bayi. *Berita Harian*, p. 5.

- n.n. (2010, 13 Ogos). Hukuman Mati Kes Buang Bayi. *Berita Harian*.
Orphan Care Children. (6 April, 2015). *Every child needs a family*. Retrieved
from [http:// www.hati.my/children/orphancare/](http://www.hati.my/children/orphancare/) at 21 Julai 2016.
- Pembuangan Bayi*. Bahagian Penyelaras Undang-undang, Jakim.
- Pendakwa Mahkamah Syariah Perak *lwn* Dewi Hayati (*Jurnal Hukum* 77).
- Pendakwa Mahkamah Syariah Perak *lwn* Fatima (*Jurnal Hukum* 321).
- Pendakwa Syarie *lwn* Mohd. Nabil bin Ramli [2015] 3 *ShLR* 34 – 44.
- Pendakwa Syarie *lwn* Noor Wahida bt Ahmad Azri [2013] 3 *ShLR* 116 –
124.
- Pendakwa Syarie *lwn* Wan Mohd. Faizdehar bin Wan Abdullah (2012) 3
ShLR 112.
- Peter Ling, Anna Teoh, & Nizam Hamdan (Eds). (2001). *Penal Code (Act
574) (Revised –1997), The annotated statutes of Malaysia, with relevant
subsidiary legislation*. Kuala Lumpur: Malayan Law Journal.
- Ramadan, & H. M. (2006). *Understanding Islamic law: From classical to
contemporary*. United Kingdom: Altamira Press.
- Ramizah Wan Muhamad. (2015). Khalwat as a moral crime in Malaysia:
Issues and realities. *Journal of Islam, Law and Judiciary*, 1(2), 1 – 25.
- Ratanlal, & Dhirajlal. (1988). *Law of crimes* (Vol. II). New Delhi: Bharat
Law House.
- n.n. (n.d.). *Rumah perlindungan untuk wanita*. Retrieved from [http://www.
kembarahadi.com/2012/04/rumah-perlindungan-untuk-wanita_12.html](http://www.kembarahadi.com/2012/04/rumah-perlindungan-untuk-wanita_12.html)
at 6 April 2015.
- n.n. (2015, 17 Disember). 78 kes buang bayi dicatat sehingga Ogos. *Sinar
Harian.online*. Retrieved from [www.sinarharian.com.my/nasional/78-
kes-buang-bayi-dicatat-sehingga-ogoss-1.463061](http://www.sinarharian.com.my/nasional/78-kes-buang-bayi-dicatat-sehingga-ogoss-1.463061).
- S. Mansoor. (2014, 24 Januari). Awareness Talk: Social III: Baby Dumping.
Centre for Foundation Studies, IIUM, Petaling Jaya,
- Siti Zubaidah Ismail, & Muhammad Zahiri Awang Mat. (2007). *Polis moral
dan masyarakat sifar jenayah: Cabaran Bahagian Penguatkuasaan
dan Pendakwaan Jabatan Agama Islam dalam usaha pencegahan
jenayah syariah* (pp. 317 – 334). Surabaya: Penerbit Jabatan Usuludin
dan Falsafah dan IAIN Sunan Ampel.
- Siti Zubaidah Ismail. (2008). Dasar penguatkuasaan dan pendakwaan
jenayah syariah di Malaysia: Satu analisis. *Jurnal Syariah*, 16 (Keluaran
Khas), 537 – 554.
- Siti Zubaidah Ismail. (2014). Hudud dan undang-undang jenayah syariah
dalam kerangka perlembagaan dan sistem perundangan “dualisme”:
Komitmen pelaksanaan ke arah membendung jenayah di Malaysia.

- Jurnal Syariah*, 22(2), 193 – 212.
- Siti Zubaidah Ismail. (2016). The legal perspective of khalwat (close proximity) as a shariah criminal offence in Malaysia. *Pertanika Journal Social Sciences & Humanities*, 24(3), 905 – 917.
- Suresh Narain Mulla, & Chedda Lal Gupta. (1988). *Nelson's Commentary on the Indian Penal Code*.
- Syaidatun Nazirah Abu Zahrin, Rezki Perdani Sawai, Mohd. Shahrul Faizie Zaini, & Allawati Kasri. (2014). Pendekatan dakwah melalui 'Konsep Cinta Muslim' dalam menangani masalah sosial remaja. *Al-Hikmah*, 6, 21 – 34.
- T. M. Massaro. (1991). Shame, culture, and American criminal law. *Michigan Law Review* 89(7), 1895 – 1899.
- Termizi, M., Jaafar, N. I. M., Abdullah, N., Tagaranao, M. S., & Safian, Y. H. M. (2014). Comparative study of punishment and preventive methods of baby dumping: Malaysian perspectives. *International Journal of Technical Research and Applications*, 2(Special Issue 4), 24.
- The Malaysian Outsider. (2012, 7 Julai). The rise of baby dumping in Malaysia. Retrieved from <http://myrumbleswordpress.com/2012/07/07/the-rise-of-baby-dumping-in-malaysia> at 15 Oktober 2014.
- Undang-undang Pentadbiran Agama Islam (Perak) 1965.
- Sholina Osman. (2010, 13 Ogos). Kabinet arah siasat kes buang bayi ikut Kanun Keseksaan: Hukuman mati jika sabit kesalahan. *Utusan Online*. Retrieved from http://ww1.utusan.com.my/utusan/info.asp?y=2010&dt=0813&sec=Muka_Hadapan&pg=mh_01.htm at 9 Mei 2015.
- n.n. (2014, 4 Disember). Bilangan anak luar nikah meningkat. *Utusan Online*. Retrieved from <http://m.utusan.com.my/beritaparlimen/bilangan-anak-luar-nikah-meningkat-1.32383> at 14 Ogos 2016.
- Wickneswaran a/l Kaliaperumal. (2005). *Konvensyen mengenai Hak Kanak-kanak* (perkara 7, perkara 6, perkara 19 CRC). Retrieved from <http://www.suhakam.org.my>, ISBN 983-2523-27-3 at 21 Ogos 2016. Kuala Lumpur: Ampang Press Sdn. Bhd.

Diperoleh (*Received*): 20 Februari 2017

Diterima (*Accepted*): 13 September 2017